

Perkhidmatan² Kebajikan dan Masharakat

I.—PENDAHULUAN

821. Bab ini membinchangkan ranchangan² kemajuan pembedaran, perumahan dan perkhidmatan² sosial dan masharakat, yang bertujuan untuk memperbaiki keadaan hidup penduduk² bandar dan luar bandar. Ranchangan² ini merupakan tambahan kepada ranchangan² pelajaran, kesihatan, bekalan ayer dan letrik, dan pengangkutan sebagaimana yang diterangkan dalam Bab² yang terdahulu. Ranchangan² ini juga merupakan satu unsur penting dalam strateji membasmi kemiskinan dan mengurangkan jurang perbezaan ekonomi.

822. Kawasan² bandar merupakan tumpuan penting bagi ranchangan² ini. Sementara kawasan² ini memainkan peranan penting dalam pemodenan masharakat Malaysia, perkembangannya pula menimbulkan berbagai² masalah ekonomi dan sosial. Kemajuan perusahaan² dan perkhidmatan² di-kawasan² ini telah menarek sa-bilangan besar belia² dari kawasan² luar bandar dan pekan² kecil. Sebalek-nya pula, masalah² kesesakan dan penganggoran telah timbul, dengan di-sertai oleh akibat² sosial yang sering terdapat di-bandar². Perumahan, kemudahan² bekalan ayer dan letrik dan perkhidmatan² masharakat di-bandar telah ketinggalan di-belakang perkembangan² bandar. Perkembangan bandar yang begitu pesat telah menambahkan lagi jurang perbezaan penyertaan berbagai² kaum dalam kegiatan² sektor moden.

823. Dalam tempoh Ranchangan Malaysia Kedua, perhatian yang lebeh tegas akan di-tumpukan kepada usaha mengatasi masalah² ini. Ranchangan² kemajuan bandar, termasuk usaha² memberseaskan kawasan² perumahan terbiar dan setingan, membena rumah², memperbaiki sistem²

bekalan ayer dan saloran najis dan mengadakan lain² kemudahan awam, ada-lah aspek² penting Rancangan Malaysia Kedua. Rancangan² kemajuan bandar akan juga memberi kesempatan² yang lebeh luas untok orang² Melayu dan bumiputra² yang lain menyertai kegiatan² perusahaan dan perniagaan di-bandar², supaya bandar² di-Malaysia benar² menggambarkan sifat berbilang kaum negara ini.

824. Di-kawasan² luar bandar, perkhidmatan² dan kemudahan² masharakat yang lebeh luas lagi sangat² di-perlukan. Berbagai² perkhidmatan dan kemudahan² telah pun di-adakan dalam usaha² pembangunan yang lampau dan selanjut-nya perkhidmatan² dan kemudahan² ini akan terus di-perluaskan dalam tempoh Rancangan Malaysia Kedua. Di-samping rancangan² bekalan letrik dan ayer, sekolah², perkhidmatan² kesihatan dan jalan² raya luar bandar, sebagaimana yang di-terangkan dalam Bab² yang terdahulu, perenggan² berikut menerangkan beberapa rancangan lain untok penduduk² di-luar bandar dan dalam bandar, saperti mengadakan rumah², kemudahan² kerehatan dan pasar².

II.—PERUMAHAN

825. Rancangan perumahan awam merupakan unsor penting dalam rancangan perumahan negara. Pada asas-nya, rancangan ini ada-lah untok memenohi keperluan semua kumpulan² masharakat yang berpendapatan rendah, tanpa mengira asal keturunan mereka. Ia bertujuan menghapuskan kawasan² perumahan terbiar dan kehidupan setinggalan, di-samping menyelesaikan masalah² sosio-ekonomi berikutan dengan perkembangan pesat kawasan² bandar di-sekitar tanah ayer.

826. Kerajaan akan terus menitekberatkan projek² pembangunan perumahan awam oleh kerana usaha² saperti ini tidak menarek perhatian pem-bena² swasta, yang menumpukan kegiatan² mereka bagi kumpulan² yang berpendapatan pertengahan dan tinggi. Kerajaan Persekutuan akan menumpukan perhatian-nya di-sekitar Ibu Kota Persekutuan, sementara Kerajaan² Negeri akan memenohi keperluan² di-kawasan² lain dalam negeri² masing dengan bantuan wang dari Kerajaan Persekutuan. Kemudahan² perkhidmatan Amanah Perumahan akan di-gunakan untok rancangan perumahan negara.

827. Rancangan perumahan negara dalam Rancangan Malaysia Kedua akan menitekberatkan dua aspek penting untok menggambarkan dengan lebeh jelas lagi tujuan utama Rancangan, ia-itu, memupok perpaduan negara. Pertama, rancangan perumahan negara akan di-bentok bagi

menyatukan masyarakat berbilang kaum. Kedua, perancangan mengenai perumahan akan meliputi peruntukan perkhidmatan² masyarakat yang mustahak dan keperluan² lain, supaya kompleks perumahan baharu ini seberapa yang boleh lengkap dari segenap segi. Ini ada-lah penting terutamanya di-Ibu Kota Persekutuan di-mana projek² perumahan yang besar akan di-laksanakan dalam tempoh Rancangan.

828. Dalam Rancangan Malaysia Pertama, sa-jumlah \$188.1 juta telah di-peruntukkan bagi perumahan. Dari jumlah ini \$173.2 juta ada-lah untuk Malaysia Barat, \$7.4 juta bagi Sabah dan \$7.5 juta bagi Sarawak. Rancangan perumahan di-Malaysia Barat pada mula-nya telah di-laksanakan dengan perlahan² tetapi telah berjaya membuat beberapa kemajuan dalam tahun² 1968-70. Pada akhir tempoh Rancangan Malaysia Pertama, 22,522 buah rumah murah telah di-bena, hampir² separoh dari-nya ada-lah terdiri dari rumah² pangsa. Saperti yang di-tunjokkan dalam Jadual 16-1, kejayaan Rancangan ini ada-lah hampir² tiga kali dari tempoh lima tahun sebelum itu.

JADUAL 16-1

KEMAJUAN RANCANGAN PERUMAHAN AWAM,
MALAYSIA BARAT, 1956-70

<i>Tempoh</i>		<i>Perbelanjaan</i> (\$ juta)		<i>Bilangan di-bena</i>
1956-60	...	9.33	...	2,983
1961-65	...	33.27	...	7,568
1966-70	...	99.79	...	22,522

829. Untuk Rancangan Malaysia Kedua, sa-banyak \$171.9 juta ada-lah di-peruntukkan bagi perumahan awam di-seluruh Malaysia. Dari peruntukan ini, sa-banyak \$89.68 juta ada-lah bertujuan untuk membiayai projek² perumahan negara di-Malaysia Barat, \$62.51 juta daripada-nya ada-lah untuk projek² di-Ibu Kota Persekutuan. Projek² ini yang akan di-lancharkan bersama oleh pihak² berkuasa Persekutuan, Negeri dan Majlis Perbandaran, akan melibatkan pembenaan beberapa buah rumah pangsa bertingkat², lengkap dengan perkhidmatan² masyarakat yang berkaitan, di-kawasan² yang terpilih.

830. Kerajaan² Negeri di-Malaysia Barat juga akan melaksanakan rancangan² perumahan awam di-kawasan² bandar yang lain, kebanyakan-nya melalui PKEN². Sa-jumlah \$11.14 juta akan di-belanjakan oleh Kerajaan² Negeri. Di-Malaysia Timor, Sabah akan membelanja sa-banyak \$23.23 juta dan Sarawak sa-banyak \$12.5 juta.

831. Kerajaan akan terus menggalak serta membantu pembena² rumah swasta. Di-samping itu, Kerajaan² Persekutuan dan Negeri akan mempercepatkan kemajuan perumahan swasta melalui bantuan kepada pekerja² awam dalam rancangan memileki rumah sendiri. Dalam hal ini, sa-buah sharikat bagi kemajuan perumahan untuk pegawai² Kerajaan ia-itu Sharikat Kemajuan Perumahan Pegawai² Kerajaan Sendirian Berhad, telah di-tubuhkan dan sa-banyak \$30 juta telah di-peruntokkan bagi tujuan ini. Selanjut-nya, sa-banyak \$16.5 juta telah di-peruntokkan bagi rumah² kediaman pekerja² Kumpulan Perusahaan dan Buroh Kasar (KPBK) serta sharikat² perumahan kerjasama dan bagi membaiki dan membaharui rumah² Kerajaan. Untuk merangka dasar² dan rancangan² perumahan negara serta mengkaji kemajuan perlaksanaannya, satu Majlis Perunding Negara untuk Perumahan telah di-tubuhkan. Majlis ini ada-lah di-anggotai oleh Menteri² Besar dan Ketua² Menteri serta di-ketuai oleh Timbalan Perdana Menteri. Satu jawatankuasa terdiri dari pegawai² dan wakil² swasta akan membantu kerja² Majlis tersebut.

832. Kerajaan Persekutuan memileki sa-jumlah besar saham² Sharikat Perumahan Malaya Borneo Berhad (SPMB), yang telah di-susun sa-mula supaya menjalankan perkhidmatan-nya di-Malaysia sahaja. SPMB adalah badan yang terbesar dalam sektor swasta bagi memberi pinjaman² perumahan. Syarat² pinjaman-nya ada-lah pada umum-nya lebih berpatutan dari badan² peminjam yang lain. Harta² chagaran bertambah daripada \$88.31 juta pada awal tahun 1966 kepada \$142.14 juta pada akhir tahun 1970. Dalam tempoh ini, pinjaman² berjumlah sa-banyak \$137.8 juta telah di-luluskan bagi membiayai pembelian sa-banyak 14,000 buah rumah. Pembayaran balek pinjaman² yang di-anggar bagi tempoh 1971-75 berjumlah sa-banyak \$170 juta, dan ini akan membiayai kos kira² 17,000 buah rumah.

III.—KEMAJUAN BANDAR

833. Perkembangan kawasan² bandar di-seluruh negeri yang begitu pesat telah mewujudkan kawasan² perumahan terbiar dan keadaan yang bertambah sesak dan kotor. Kebanyakan-nya, tumpuan penduduk yang

sangat ramai dan perkembangan pusat² perniagaan dan perusahaan tidak-lah teratur dan tidak selaras dengan chara kegunaan tanah bandar yang chekap atau dengan kemajuan kemudahan² perniagaan dan masharakat. Masalah ini menjadi lebeh burok lagi di-sebabkan penyertaan yang tidak sa-imbang dari segi kaum di-lapangan perusahaan dan perniagaan moden. Kesemua ini jelas menunjukkan betapa perlu-nya di-adakan satu chara baharu yang lebeh kemas dalam usaha memajukan kawasan² bandar.

834. Satu Lembaga Pembangunan Bandar (LPB) telah di-tubuhkan untuk mengatasi masalah² ini dengan lebeh berkesan lagi. Lembaga ini akan bekerja rapat dengan pihak² berkuasa di-pekan², perbandaran² dan Kerajaan² Negeri dan akan menumpukan perhatian-nya kepada pembaharuan sa-mula bandar², pembersehan kawasan² setinggan dan perumahan terbiar, pembenaan rumah² dan usaha² pembaharuan yang lain untuk menentukan kegunaan kawasan² bandar ini dengan chara yang baik dan ekonomi.

835. Sebagai permulaan, Lembaga ini akan menumpukan tenaga-nya di-Kuala Lumpur di-mana masalah²-nya sangat burok dan memerlukan tindakan segera. Tindakan² segera yang akan di-lakukan ia-lah memajukan sa-mula dengan serba lengkap, mengawal dan memuleh bandar itu untuk menyesuaikan-nya dengan perkembangan penduduk², lalu lintas, pekerjaan dan perniagaan. Di-samping itu, Lembaga ini juga akan mengadakan bangunan² perniagaan bagi orang² Melayu dan bumiputra² yang lain sebagaimana yang di-terangkan dengan lebeh jelas-nya dalam Bahagian V, Bab X.

IV.—RANCHANGAN² SALORAN NAJIS

836. Keperluan memperbaiki dan mengadakan kemudahan² dan tambahan kepada saluran najis bagi bandar² besar di-Malaysia ada-lah mustahak dan akan di-beri keutamaan dalam tempoh Ranchangan. Projek² penting yang akan di-mulakan termasuk-lah ranchangan saluran najis di-Ipoh dengan peruntukan permulaan sa-banyak \$5 juta; satu kajian kemungkinan bagi membesarkan ranchangan saluran najis di-seluruh kawasan perbandaran Kuala Lumpur dan membesarkan kerja² penapisan saluran najis di-Lembah Pantai; dan membesarkan sistem saluran najis di-Bandar Raya Pulau Pinang.

V.—KEBUDAYAAN, BELIA DAN SOKAN

837. Rancangan² dalam sektor ini akan di-tumpukan kepada kemajuan belia. Dengan tersiap-nya berbagai² rancangan pelajaran, latihan dan pekerjaan yang telah di-huraikan dalam Bab² VII dan XIV, Kerajaan akan terus melaksanakan projek² lain bertujuan menolong belia² menjadi produktif dan berdikari. Kegiatan² belia akan di-salor untuk menghasilkan pemikiran yang kreatif, berbagai² kemahiran, kechenderongan kepada seni dan budaya, semangat kerjasama kemasyarakatan dan pimpinan belia. Pusat serbaguna dan kemudahan² lain untuk kemajuan belia akan di-tubuhkan di-sekitar tanah ayer. Institusi² ini akan mengadakan peluang² bagi belia² mempelajari kursus² latihan mengenai pimpinan, kemahiran² dalam berbagai² jenis kerja yang membolehkan mereka mendapat pekerjaan² yang produktif, pengajaran dan latihan mengenai sokan dan kegiatan² kebudayaan. Kemudahan² sokan seperti stadium dan lain², setaraf dengan mutu antarabangsa, akan di-bena dalam tempoh Rancangan.

838. Majlis Perundingan Belia Kebangsaan telah di-tubuhkan bagi mengadakan satu perhubungan yang lebeh berkesan di-antara Kerajaan dan kumpulan² belia dalam negeri. Melalui Majlis ini dan rancangan² lain, pertubohan² belia di-negeri ini akan di-satupadu dan di-sesuaikan selaras dengan tujuan² pembangunan negara. Majlis Sokan Kebangsaan telah pun di-tubuhkan bagi menyelaraskan kegiatan² berbagai pertubohan sokan supaya dapat di-adakan kemudahan² latihan bagi meningkatkan mutu sokan. Majlis Kebudayaan Kebangsaan akan di-tubuhkan bagi menyelaraskan dan memupok kegiatan² kebudayaan.

839. Kemajuan kebudayaan kebangsaan ada-lah amat penting bagi mewujudkan perpaduan negara. Untuk memudahkan kemajuan ini Kerajaan akan menubuhkan satu Kompleks Kebudayaan Kebangsaan, termasuk sa-buah Panggong Negara, menggalak dan memajukan seni² muzik, tari dan lakun dalam negeri.

VI.—PROJEK² PARIT DI-KAWASAN BANDAR

840. Sa-banyak \$9 juta telah di-peruntukkan bagi projek² parit di-kawasan bandar, terutama-nya bagi membena parit² dan longkang² yang akan memperkemaskan lagi usaha² mengawal banjir. Dari jumlah ini, \$3 juta ada-lah untuk projek² di-Malaysia Barat, khusus-nya di-Ibu Kota Persekutuan di-mana sistem² parit akan di-perbaiki. Sa-banyak \$5 juta ada-lah di-peruntukkan bagi negeri Sabah dan \$1 juta bagi Sarawak untuk projek² seumpama ini.

VII.—PERKHIDMATAN² BOMBA

841. Sa-bahagian besar negeri ini mempunyai perkhidmatan² bomba yang chukop. Peruntokan sa-banyak \$700,000 ada-lah di-buat untok menubuhkan sa-buah Sekolah Pusat Latehan Bomba di-bawah Kementerian Teknologi, Penyelidikan dan Kerajaan Tempatan. Dengan penubohan Sekolah ini, latehan bagi semua kakitangan² perkhidmatan bomba di-seluruh negeri dapat di-adakan. Sa-jumlah \$5.88 juta akan di-belanjakan oleh negeri² di-Malaysia Barat untok memperbaiki perkhidmatan² bomba, sementara Sabah akan membelanjakan sa-banyak \$9.25 juta, terutama-nya bagi membeli kereta² bomba dan membena balai² bomba.

842. Jumlah peruntokan bagi Perkhidmatan Bomba dalam Ranchangan Malaysia Kedua ia-lah \$16.23 juta.

VIII.—PERKHIDMATAN KEBAJIKAN MASHARAKAT

843. Projek² dalam sektor ini ada-lah bertujuan untok membaiki dan memperluaskan kemudahan² bagi menjaga, menolong dan memuleh anggota² masharakat yang kurang bernasib baik. Yang penting di-antara projek² ini ia-lah membena sa-buah Rumah Orang Sakit Melarat di-Selangor dan sa-buah lagi di-Tampoi, Johor, untok memberi perkhidmatan ini bagi kawasan Selatan; sa-buah Rumah Orang² Tua di-Melaka; sa-buah Sekolah Akhlak di-Pahang dan Pusat untok Kanak² Chachat Anggota dan Kecederaan Otak serta sa-buah Sekolah Budak Laki² di-Taiping. Peruntokan telah juga di-buat bagi membena rumah² kakitangan tambahan serta memperbesarkan bangunan² kebajikan masharakat yang ada sekarang. Projek² yang seumpama ini juga akan di-laksanakan di-Sabah dan Sarawak.

IX.—ORANG ASLI

844. Usaha² lanjut akan di-buat dalam tempoh Ranchangan bagi memajukan kedudukan ekonomi dan sosial Orang² Asli dan menyatukan mereka dengan kaum² lain di-negeri ini. Ini akan di-chapai dengan chara menggalakkan lagi kemajuan tanah yang baharu, ranchangan² jayadiri dan ranchangan² mengadakan kemudahan² pelajaran dan kesihatan yang lebeh sempurna. Sa-jumlah \$7.38 juta ada-lah di-peruntokkan dalam Ranchangan untok tujuan² ini, berbanding dengan hanya \$4.9 juta yang telah di-belanjakan dalam Ranchangan Malaysia Pertama.

X.—PERKHIDMATAN² MASHARAKAT YANG LAIN

845. Sebagai tambahan kepada ranchangan² yang di-huraikan di-atas, sa-banyak \$67.3 juta telah di-peruntokkan dalam Ranchangan untuk projek² perkhidmatan masharakat yang lain. Projek² ini ada-lah untuk kawasan² bandar dan luar bandar dan termasuk-lah mengadakan atau membaiki parit², pasar², ranchangan² bekalan ayer yang kecil, ampangan², balai² raya, padang² permainan, lampu² jalan, perhentian² bas dan seumpama-nya. Di-mana yang boleh, projek² ini akan di-laksanakan sechара bergotong-royong.

846. Di-Sabah dan Sarawak, peruntokan masing² ia-lah sa-banyak \$11.79 juta dan \$32.51 juta. Tumpuan akan terus di-buat bagi mengadakan dan membaiki pasar² dan bazar², kerja² pemulehan tanah dan lain² projek majlis² tempatan untuk mengadakan kemudahan² kecil.

847. Peruntokan² untuk perkhidmatan² sosial dan masharakat dalam Ranchangan Malaysia Kedua ada-lah di-tunjokkan dalam Jadual 16-2.

JADUAL 16-2

PERUNTOKAN BAGI PERKHIDMATAN² KEBAJIKAN DAN MASHARAKAT, 1971-75

(\$ juta)

	<i>Malaysia Barat</i> (Persekutuan)	<i>Malaysia Barat</i> (Negeri ²)	<i>Sabah</i>	<i>Sarawak</i>	<i>Jumlah</i>
Perumahan	125.02	11.14	23.23	12.50	171.89
Saloran najis	13.60	—	10.37	—	23.97
Parit	3.00	—	5.00	1.00	9.00
Perkhidmatan bomba	1.10	5.88	9.25	—	16.23
Kebudayaan, belia dan sokan ..	5.00	—	1.23	1.00	7.23
Perkhidmatan ² kebajikan masharakat	10.93	—	2.06	0.48	13.47
Orang asli	7.38	—	—	—	7.38
Perkhidmatan ² masharakat yang lain	7.70	15.30	11.79	32.51	67.30
Jumlah ..	<u>173.73</u>	<u>32.32</u>	<u>62.93</u>	<u>47.49</u>	<u>316.47</u>